



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 8

BSP-i linük tesem ajaklen caste census
agitsü takhangba agütsü

Rafael Nadal January ita
Brisbane International nung asayatsü



VOL. XXI NO. 56 (ADOK 56) DIMAPUR AMUNGNÜ (SUNDAY) LUCHII (DECEMBER) 03, 2023 ₹ 5.00

Wazeho cement plant lapokshitsüla: RPP

Dimapur, December 2, 2023 (TYO): Sorkar yimsüsür kari kol tamajung alitsü lemtetba ajanga 2004 nungi Wazeho Cement Plant nung mapa meinyakteti arur ta Rising People's Party (RPP)-i metetdaksüogo.

RPP-i tawa Avangkhu ITC (International Trade Centre) den Meluri sub-division sema senzüdang iba kuli ngutet.

Nagaland kübok Phek district nung aliba Wazeho Cement Plant ya 50 TPD (Tonnes Per Day) facility ka ama amenoka liasü aser 1992 nungi 2023 tashibo mapa shitak dang inyaka aru.

Ajisüaka Saboo Engineering Pvt Ltd nungi koltem bener arua 50 TPD nungi 150 TPD capacity akümsü lemtet ajanga ashishitep ken o adok aser plant nung mapa meinyakteti aküm.

Nagaland State Mineral Development Corporation (NSMDC) nung ketdangsürtemi kol majunga ta shiaka state sorkari plant tuluba akümsüba mapa tanzük. Iba lemtet nung tang aliba sorkar yimsüsür karda dena liasü aser süpokrem mesüra senotsü ajanzüktsü atema kol tamajung ali asütsü akok ta RPP-i ashi.

Wazeho Cement Plant shibangba ajanga iba temeket nung aliba tesem tejakleni maer aser rongsenketzüng jenjang mejungi lir. Iba ya sorkar yimsüsür kari ozüng alema inyaksangshiba ajanga lir anungji jungjunga bushisingdangtsü tim ta RPP-isa ashi.

Wazeho Cement Plant privatization asütsü tebilemba

RPP-i magizüker aser Nagaland Legislative Assembly nung Committee on Public Undertakings (COPU) for 2020-21-ia Wazeho Cement Plant ya privatized asüba melenabo state sorkari dang ketdangsüa aotsüla ta shiogo.

State sorkari plant ulushiba sülen aiben privatize asütsü meranga aruba sülen COPU-i iba ya shidanga liasü. COPU-i ashiba ya NSMDC chairman dang nenshia metetdaksür aser Rs. 20-30 crore shi enoka plant asentenshia lapoktsü metetdaksür.

“NDPP-BJP teloktep sorkari MLA 60 nem Rs 120 crore aser JCBs 23 agütsütetra kodaser cement plant atema Rs. 30 crore magütsütettsü?” ta RPP-i asüngdangogo.

Wazeho nung aliba NSMDC mapa inyaktermi plant takok ngua ketdangsüa otettsü. Ano Wazeho ajanga Burma tashi two-lane connectivity mapa tatemleni arudar aser Avangkhu International Trade Centre ajanga Meluri sub-division nung alirtem kanga ajanzüktsü ta RPP-isa ashi.

Wazeho cement plant asentenshia lapokba ajanga Nagaland nung Meluri ya per capita area takartiba akümsü aser Moreh mesüka jila ka akümsü ana nung lir kechiyong Burma nung cement kanga nungdaker ta RPP-isa metetdaksüogo.

Sorkari Wazeho Cement Plant ya asentenshia lapoktsüla aser iba tesem nung rongsenketzüng jenjang ajungkettsüla ta RPP-isa nenshia ashi.

PWDs atema State Level Committee tentettsü

Kohima, December 2, 2023 (TYO): Nagaland nung persons with disabilities (PwDs) atema State Level Committee (SLC) ka tentettsü ta Chief Minister Neiphiu Rio-i ashi.

Naga Heritage Village Kisama nung Disability Pride Fair 2023 lapoktsüdang pai iba osang metetdaksü.

Iba Fair ya International Day of PwDs nungtem nung State Commission for PwDs aser Department of Social Welfare Nagaland yaritepa ayongzük.

“State sorkari PwDs asoshi inyaksüla saka meinyaki dang aruogo. Anungji Chief Secretary-i anir State Level Committee ka tentettsü aser iba nung Home Commissioner, Finance Commissioner, Social Department aser State PwD Commissioner züngsemtem asütsü” ta CM Rio-i ashi.

SLC-i PwDs yaritsü aser parnok asoshi maparen inyaksü tebilemba lemsateptsü. Tangar memepertem asoshi corpus fund ka tanzüktsü aser iba

atema Rs 1 crore enoktsütsü ta paisa ashi. State Commission for PwDs aser Social Welfare Department-i International Day of PwDs aser Hornbill Festival den külemi Fair ayongzüktsü apitetba atema pelar. Iba ya North East jenjang nung agitsüla aser sorkari akokba tashi yariteptsü ta CM Rio-isa ashi.

“Iba Fair nung PwDs-i yangluba osettsüet balala sayur aser ayoker. Maneni PwDs rongnung kentenerem aser kongki atemertemia shilem agir” ta Social Welfare Commissioner & Secretary Martha R Ritse-i ashi.

“Tesüba küm ishika tsünga disability sector nung mapa aika inyaktetogo. Nagaland nung mezüng atema Rights of Persons with Disabilities Act 2016 yangluogo, PwDs atema 4% Job Reservation sangoktsüogo aser iba quota ya benshia arudar aser ano PwDs anema inyakba ken o tem atema special courts lapokogo” ta State Commission for PwDs Diethono Nakhro-i ashi.

CM Rio-i Nagaland nung modern farming tenzüktsü ajungshir



December 2, 2023 nü Millets Festival nung nung CM Neiphiu Rio-i takok angurtem den külemi agiba noksa ka angur.

Kohima, December 2, 2023 (TYO): Nagaland ya aluyimba dak sendakba state ka asünunga tanga state tem nungi ang jangotsü aser tanga chiyungtsü bener arua chiyonger ta Chief Minister Neiphiu Rio-i ashi.

“Asen state rongsenketzüng jenjang tajungba akümsü atema shia meteteremi yaria modern farming tenzüktsüla aser scientific research agi nungittsüla” ta pai ashi.

“Naga nungeri wadang balala nung shia meteta meteta lir saka tensa den apet aluyimertem akümsü atema peii meteta aliba shisatsü mamshir” ta CM Rio-isa ashi.

Honibarnü Organic Pavillion, Kisama nung Agriculture Department-i ayongzükba Millets Festival nung pai iba onük jemb. International Year of Millets tembangba tenung nung iba benjung ayonga among.

“Tanü putu den apet aluyimba inyakyim melentsüla aser technology o scientific research adentsüla. Asenoki alemli nungi benshia aruba aluyimba inyakyim ajanga tajanzük aika mangur anungji Agri nung graduate mesüra diploma azüngertemi anir agriculture, horticulture o veterinary nung progressive farming tenzüktsüla” ta pai ashi.

“Naga nunger shi kanga achir anungji Veterinary and Animal Husbandry Department-ia backyard farming ajungmesotsüla. Asenok kechi achiajemer ibaji asen sasa züsenteta achitsüla” ta CM Rio-isa ashi.

Nagaland nütsüng yongsük nungi 70% shi aluyimertem lir

saka asenok jangotsü peria mali anungji Agri and allied departments-i modern farming ajungmesotsü imlar, ta paisa shisem. “State sorkari Central Minister dang essential commodities nung Millets dendaktsütsü atema asüngdangtsü. Company temi Nagaland nung millet contract farming asütsü mulunga lir anungji asenoki yoktetsüsa tsünütsüla. Iba atema Minimum Price Protection nungdaker” ta CM Rio-isa metetdaksü.

“Nagaland nung Foxtail millet dena Millets tapu 4 indang GI registration maparen inyakdar” ta Agriculture Advisor Mhathung Yanthan-ia ashi.

Nagaland nung Millets ya amadoker liasü saka 12,000 hectares nung tsünüba sülen tangbo 19,000 hectares nung tsünüdar, ta pai ashi.

“Tesüba küm 12 tashi North East Network-i millets-based agro-ecological farming systems mapa inyaka arur” ta NEN state coordinator Wekoweu Tshah-i ashi.

“Iba maparen tenzük dang nungi tang tashi asadangra aluyimertem, alia achirtem, shishilembartem aser policy yanglurtemi millets tali angateta kümogo. Tesüba nungbo millets dang 'coarse cereals' ta aja saka tanübo 'nutri' cereals aser 'superfoods' ajar” ta laisa metetdaksü.

“Aluyimertem, teloktem aser rejutemi kanga meranga inyaka aruba ajanga sorkari Millets indang ola angashi aser alima jenjang nung 2023 ya International Year of Millets

sangdong” ta Wekoweu-isa ashi.

Iba benjungmong nung Chief Minister Rio-i “Revitalising millets in Northeast India” policy sayatsü. Iba ya University of Reading, UK & Himalayan University Consortium, Thematic Working Group on Mountain Agriculture ajanga yangluba lir. Iba sentong nung Commissioner & Secretary, Agriculture, Sushil Kumar Patel-i tesentepertem pelaa agizük, Joint Director, Agriculture Ketsukha Kath-i IYoM 2023 agütsü aser Agriculture Director M. Ben Yanthan-i anküp tepela o jemb.

CM Rio-isa tsünglanglen agüja aliba sempettem agütsü.

Village category: Best Millets village award to Chingmai village, Tuensang district (Rs 50,00 with citation); Excellent Millets award to Pessao village, Tobu sub-division, Mon district (Rs 30,000 with citation) and Good Millets award to Chipur village, Noklak district (Rs 20,000 with citation).

Self Help Group category: Best Millet SHG – Women Society Thuvopisu, Phek district (Rs 30,000 with citation), Excellent Millet SHG – Tse Badze, Chiechama, Kohima district (Rs 20,000 with citation), Good Millet SG – Millet Sisters, Meluri, Phek district (Rs 5,000 with citation).

Individual category: Best farmer - Chabao Hamlong of Tobu, Mon district (Rs 20,000 with citation); Excellent farmer – Senjang of Chingmei village, Tuensang district (Rs 15,000 with citation) and Good farmer – Shingnyoa, Chipur village, Noklak district.

Mizoram Civil society-i pelaa agizüker: Mizoram CEO

Aizawl, December 2, 2023 (Agencies): Mizoram nung civil society aser telok balalai votes azünga anogo melenshiba pelashishia agizüker ta Mizoram Chief Electoral Officer Madhup Vyas-i ashi.

Khristantem teimba ser aliba Mizoram nung Deobar ya kanga dang tongtipang anogo ka lir aser iba jagi civil society organisations (CSOs)-i anogo melenshiba pelaa agizüker, ta pai ashi.

“ECI-i state pungu nung December 3 nü votes azüngtsü lemtet, ajisüaka Mizoram nung CSOs aser political party temi Election Commission dang anogo melenshitsu mepishi. Anungji Election Commission-i yashi Mizoram nung December 3 masü saka December 4 nung ang votes azüngtsü mulunga agizük” ta Vyas-i ashi.

“Election Commission-i anogo melenshiba sülen onoki counting day atema renema lir.

State kübok tesem balala nung counting halls 40 nung votes azüngtsü” ta Mizoram CEO-isa ashi.

“Assembly 40 shia nung counting hall kaka lir aser EC-i counting observers 40 yokogo. Hall shia nung counting observer-i ketdangsüa reprangtsü” ta paisa ashi.

Mizoram CEO-isa Mizoram nung counting day atema security maparen renema lir ta ashi.

Rio-i Disability Pride Fair 2023 tenzüksü

Dimapur, Luchii/December 2 (TYO): Chief Minister, Neiphiu Rio-i, International Day of Persons with Disabilities nungdem nung December 2 nü Kisama Naga Heritage Village nung Disability Pride Fair 2023 tenzüksüo.

Sentong nung o tatsüka jembiba mapang CM-i, mata mabensartem atema masetshi-i kanga meranga inyakba atema State Commissioner for Persons with Disabilities, Diethono Nakhro-i anir State Commissioner for Persons with Disabilities nem tenüngsang agüja liasü. Paisa, International Day of Persons with Disabilities ya kümshia agiba sentong ka kümdaktsütsü asoshi jenjang agiba atema parnok dang pelaba lemsatpeba den sorkari taruba kümbo corpus fund ka lapoktsütsü ta ashi.

Rio-i ashiba agi, mata mabensartem ajungkettsü asoshi jenjang aika agiogo. Paisa, parnok nem vocational training aser skill-development training agütsütsüla, ajita asünungdang parnok taküm asoshi langkabosa aazüktsü aser taküm ali shizüka litettsü, ta ashi. Rio-i, nüburttem aser talisa jenjang junga alirtem dang mata mabensartem ajungkettsü asoshi langkabosa inyakttsü ayongzük. Pai, parnok libaliro, sobaliba, yimden yimsüsüba tsütsü aser rongsenketzung jenjang ajungkettsütsü atema ayongzük liasü.

Sentong nung Secretary, Social Welfare, Martha R. Ritse-i ashiba agi, International Day of Persons with Disabilities ya matamabensartem temeden kmzüka toktsütsü aser parnok lokti indang tangazükba agütsütsü asoshi lir.

Laisa, iba anogo parnok sangrasangji aser parnok kota tashi tait aji sayur, ta ashi. Lai ashiba agi, mata mabensar 30,000 shi züngoksema lir aser parnok 7000 shi asadanger agizükogo. Ritse-i,

Department-i pensions, scholarships aser NGO tem nem grant-in-aid agüja arudar ta ashi. Maneni lai ashiba agi, Mon aser Tuensang nung Rehabilitation Centre tasen ana amenoktsü. Sorkar office aser ki kar nungibo tetsükdaktsütem aginogo ta ashiba den lai, iba amala ki ano tali nungdaker ta shisem.

Kasa mapang nung State Commissioner for Persons with Disability, Diethono Nakhro-i, ano talangka aotsü lir ta shia sorkar aser nüburttem nongita yaritsü mepeshia liasü. Laisa, matamabensartem aniok nungdang terenlok asoshi nükjidong yur aliba ataloktsü, ta ashi. Diethono Nakhro-i, Nagaland ya alima penzürtem atema tongtibang tesem ka kümdaktsütsü asoshi ajaki shilem agitetba tourism ka nungdaker ta ashi.

Disability Pride Fair indang

jembiba mapang Nakhro-i ashiba agi, iba fair ajanga mata mabensartem nem peisasa pei agizüktsütsü aser sayutsü asoshi sabang ka agütsür. Laisa, tanungba nüburttem parnok angatetsü aser iba dak sendakba nung tangazükba agütsü atema maangka ka agütsür, ta ashi. Hornbill Festival mapang Kisama nung disability information booth ka amenoka lir, ta lai metetdaksü.

Sentong nung differently-abled persons temi shilem balala agi, kong tenük tapok tetsür asem; Gracyly, Sonali aser Wangdai nungeri ken tajung ka aten, P. Daihe Kape-i taküm kuli lemsatpe, Mhonchumo Shittoi-i (tenük tapok) guitar aser harmonica piece ka sayaba densema lir. Sentong nungsa Disability Awareness dak sendakba nung Dreamz Unlimited puri yangluba video ka saya liasü.

Disability Pride Fair 2023 ya International Day of Persons with Disabilities nungdem nung office of the State Commissioner for Persons aser Disabilities, Department of Social Welfare nati longjemer ayongzükogo. Iba anogo ya küm shia December 3 nü amunger, ajisüaka taküm Deobar ajuruba ajanga December 2 nü mungogo. Bamboo Hall, Kisama nung sign language angazüksüba stall ka densema stall balala lapoka lir.

CM, Neiphiu Rio-i Photographic Exhibition lapoktsü Dimapur, Luchii/December 2 (TYO): 61buba Statehood Day amungba anogo Chief Minister, Neiphiu Rio-i Secretariat Plaza, Kohima nung Photographic Exhibition lapoktsüo. Photographic Exhibition ya Department of Information & Public Relations-i "Nagaland at 60" omen nung ajemdaker ayongzük liasü.

Exhibition nung State

lapokba anogo, Nagaland Legislative Assembly houses, state amenokba sülen tongtibang terenlok mapatem lapokba, tongtibang nisungtemi state semdangba noksatem, state, tang aser taoba mapang indang noksa, Azadi Ka Amrit Mahotsav, Road Shows, glimpses of 2023 densema liasü.

Minister, Advisor aser tanga sorkar ketdangsürtemia iba sentong nung shilem agia liasü.

DIPR-i Vlog tetoktepeba ayongzük

Dimapur, Luchii/December 2 (TYO): Hornbill Festival 2023 nung shilem ka ama Department of Information & Public Relations-i, 'Feathers of Hornbill Festival' omen nung ajemdaker Vlog tetoktepeba ka ayongzük.

Tetoktepeba nung shilem agitsü jangrartemi minute ka talang vlog ka yanglua digital format (landscape) den tenüng aser contact number, December 8 nü tashi nung diprvlog@gmail.com (via google

drive) nem agütsütettsü. Tetoktepeba resuly December 9 nü sangdongtsü.

Shilem agirtemi nisung, music, chiyongtsü, fashion, festival, libaliro aser sobaliba dak ajemdaker vlog yanglutettsü. Tetoktepeba nung shilem agitsü atema taah kecha magitsü. Osang tejangjaba agitsü atema item number; 9856197313, 7005379296 nung office mapang tongteprateptettsü, ta sentong ayongertemi metetdaksüo.

Differently Aabled tanurtem den sensaksem sentong agi

Dimapur, Luchii/December 2 (TYO): Kisama nung "SDG One Stop Destination" nung Differently Aabled tanurtem den sensaksemba sentong agiogo, kong Cherry Blossom School, Kohima nungi tanurtemi shilem agia liasü.

Deputy Chief Minister,

Planning & Transformation, National Highway, T. R Zeliang, H.E Dr. Victor Echeverri Jaramillo, India dangi Colombia Ambassador, MLA, A. Pongshi Phom aser tanga ketdangsürtemi iba sentong nung shilem agia liasü.

Ao Senden-i aitsür

Dimapur, Luchii/December 2 (TYO): Nov. 28, 2023 aonung Mokokchung Town nung mejangjaba nisungtemi Ao Kaketshir Mungdang Tongti Zülur ki kuli makai mitba maparen anema Ao Sendeni kukua aitsür. Iba ama maparen tamajung ajanga lokti menentsür aser nüburt tsüngda tesünap samadaksür.

Anungji iba maparen anema

aibelenertem bangdak tashi amertemi tekaratiba nung pua tapet temerenshi agütsütsüla. Iba den Ao senso ajaki iba ama maparen inyakerem anema mita kümküma atatsü iba sangdong ajanga nüburt ajak dang metetdaksür, ta Ao senden tir Chubawati Longchar aser tongti zülur Imtipokym nati külem sangdong ka ajanga metetdaksü.

WWII Vintage Motor Car Rally takok ngua agiogo

Dimapur, Luchii/December 2 (TYO): Hornbill festival nung shilem ka ama World War II Vintage Motor Car Rally ka ayongzükba December 2 nü WWII Museum Complex, Kisama Heritage Village nung sentong nung German Consulate General, Kolkata, Barbara Voss tongti tesemdang liasü.

Sentong nung tongti tesemdang ama o jembiba mapang lai, Hornbill festival nung shilem ka ama WWII Vintage Motor Car rally sentong ayongzükba atema tenüngsang agüja liasü. Laisa, kenten benjung nung shilem agidaktsütsü atema German band ka jaokba atema Nagaland sorkar dang kanga pelaba lemsatpe. Voss-isa, telok ana tsüngda tejangraba kasa aliba nung tesendaktep aser longjemer inyaksü koda tongtibang iba indang lemsatpe.

Lai ashiba agi, Nagaland ya tebor tajung aser nisung tajungtem aika aliba aser benjungbentsü agi sünga aliba tesem ka dang masü saka mimlaba agi sünger aliba lima ka lir ta ashi. Laisa, kümtem tsüngda rally nung amshiba garitem kanga junga wazüka yutetba atema süngmanga bilemba lemsatpe. Maneni lai iba sentong ajanga yimjung osang pokshitsü imlaba lemsatpe.

Chief Minister aser Hornbill festival Host Neiphiu Rio-i ashiba agi, Hornbill festival ajanga Naga nung takar sobaliba aser libalirotem sayuba dang masü saka benjung nung shilem ka ama WWII Vintage Motor Car Rally ayongzükba ajanga taoba puti otsütem sayur. Paisa, rally nung shilem agirtem dang kanga pelaba lemsatpe.

(Maneni tapak 8 nung...)

Mokokchung Mariani lenmang tepetzük jenjang nung lir: Ashok Kumar Yadav



Company 173 Battalion CRPF D.E.F Camp, Mokokchung nung Civic Action Programme nung tongti tesemdang Comandant 173 Battalion CRPF Ashok Kumar Yadav-i Company 173 Battalion CRPF, tetushi tesemdang Wt.Tovili Wati Mokokchung District Organising Committee, Chairman, Scout & Guides aser osettsüset balala agizükertem külemi tangokba noksa.

Mokokchung, December/ Luchii 02(TYO): Mokokchung nungi Mariani-i aluba lenmang kanga dang mejungi tepetzük jenjang nung lir ta tanü Comandant 173 Battalion CRPF Ashok Kumar Yadav-i Company 173 Battalion CRPF D.E.F Camp, Mokokchung nung Civic Action Programme nung jembidang ashi.

Company 173 Battalion CRPF D.E.F Camp, Mokokchung nung par 173 Battalion CRPF puri Civic Action Programme ayongba nung tongti tesemdang Comandant 173 Battalion CRPF Ashok Kumar Yadav-i jembidang pai pa 2001 nungi

2004 küm tashi Mokokchung nung lir oadok aser küm 18 sülen arudang Mokokchung kecha temelenshiba mangur, talisa Mokokchung nungi Mariani-i aluba lenmang akhidang ama masü saka kanga tang tepetzük tia nung lirta ashi. Lenmang mejungra alima mainerta paisa ashi.

CRPF ajanga Civic Action Programme ya nüburt yaritsü asoshi inyakba mapa ka lir, tensa den apet nüburttemi kechi nungtaker ibaji asadanger aser talisa yimsüngtem nung yimsüsürtem den angatetteper aser nungtakba oset agütsürta Comandant Ashok Kumar Yadav-isa metetdakja ashi.

Kasa sentong nung tetushi

tesemdang Wt.Tovili Wati Mokokchung District Organising Committee, Chairman, Scout & Guides liasü aser laia Company 173 Battalion CRPF dang Civic Action Programme ajanga nüburt nungtakba oset aguja yariba asoshi tepelaba lemsatpe liasü.

Civic Action Programme ajanga Chuchuyimpang, Khensa, Mountain Mover Club Khensa, Middle School Khensa, DEF School Chuchuyimpang aser Company 173 Battalion CRPF D.E.F Camp temeket nung alirtem nem Water Storage Tanks, Solar Lamps aser Sports oset angati lema agüja liasü.

SSR 2024
27 October, 2023 to 9 December, 2023
Election Commission of India

Nai 'Desh ka Form' fill-up sür ma?

Voter ka kumang mesüra Voters list nung aliba osangtem update süang

Give a missed call on 8929441950 to know more

Follow

- ecisveep /eci
- /ECIVoterEducation
- Election Commission of India

Log on to voters.eci.gov.in

Apply through Voter Facilitation Center or contact your BLO

Download the Voter Helpline App



Sh. Sachin Ramesh Tendulkar
National Icon of ECI



Asükwa mongpu Parliament jakdang December 02, 2023 nü Parliament House, New Delhi nung Minister of Parliamentary Affairs-i party balala nungi lenirtem den senden amendang tangokba noksa nung angur. Noksa nung Union Defence Minister Rajnath Singh, Union Minister of Parliamentary Affairs, Coal & Mines Pralhad Joshi, Union Minister of State for Law & Justice, Parliamentary Affairs & Culture Arjun Ram Meghwal, Congress MP tem-Jairam Ramesh, Pramod Tiwari aser Gaurav Gogoi aser tangartem angur.

Parliament nung sorkari criminal legislations densema bill 21 benoktsü

New Delhi, Luchii/ December 02 (Agencies): Taruba asükwa mongpu Parliament senden nung sorkari financial bill ana densema bill ajak senteper 21 benoktsü.

Honibarnü Parliamentary Affairs Minister, Pralhad Joshi-i, "Onoki Bill 19 den financial bill ana benoktsü. Ajak senteper 21 asütsü. Home Ministry nungia bill asem lir. Central University aser constitutional order indang bill-a lir," ta metetdaksü.

Hombar nungi tenzüka Parliament senden amentsü lia Honibarnü Centre sorkari party ajak senden ka ayongzüka menogo.

Parliament nung benoktsü aliba bill tem rongnung Bharatiya Nyaya Sanhita, Bharatiya Nagarik Suraksha Sanhita aser Bhartiya Sakshya Adhinyam densema lir. Taruba Parliament nungsa Repealing and Amending Bill (Lok Sabha nungbo agizükogo), Advocates (Amendment) Bill (Rajya Sabha

nungbo agizükogo) aser Press and Registration of Periodicals Bill (Rajya Sabha nungbo agizükogo) bill tem benoktsü.

Union Minister Joshi-isa, asükwa mongpu senden December 4 nü tenzüksü aser Khristmas matongdangsa December 22 nü tembangtsü, ta metetdaksü.

"Anogo 19 tsungda senden ajak senteper 15 alitsü," ta Union Minister-i metetdaksü.

Centre sorkari ayongzüka party ajak senden amenba dak sendakba nung Joshi-i, "Tanü Rajnath Singh leniba nung amenba party ajak senden nung Party 23 nungi lenir 30 aden. Onoki tebilemba onük aika agizükogo," ta metetdaksü.

Taruba Parliament nungsa Constitution (Jammu and Kashmir) Scheduled Castes Order (Amendment) Bill, Constitution (Jammu and Kashmir) Scheduled Tribes Order (Amendment) Bill, Jammu and Kashmir

Reservation (Amendment) Bill, Jammu and Kashmir Reorganisation (Amendment) Bill, Post Office Bill, Chief Election Commissioner & other Election Commissioners (Appointment, Conditions of Service and Term of Office) Bill, The Boilers Bill, Provisional Collection of Taxes Bill, Central Goods and Services Tax (Second Amendment) Bill, Jammu and Kashmir Reorganization (Amendment) Bill, Government of Union Territories (Amendment) Bill, National Capital Territory of Delhi Laws (Special Provisions) Second (Amendment) Bill aser Central Universities (Amendment) Bill tem benoktsü.

Financial Business dak sendakba nung o lemtapa 2023-24 kümsük atema Supplementary Demands for Grants asoshi vote agütsüsü aser iba dak sendakba Appropriation Bill agizüksü.

BSP-i linük tesem ajaklen caste census agitsü takhangba agütsü

Lucknow, December 02 (Agencies): Honibarnü party ajak senden nung Bahujan Samaj Party (BSP) Tir, Mayawati-i linük tesem ajaklen caste census agitsü takhangba agütsü.

Mayawati-i X ajanga, state sorkartem kari nüburtem taginüba tesa dang ataloktsür; linük nung caste census agiba ajanga dang iba tebilemtsü koktettsü, ta metetdaksü.

Lai X ajanga, "December 4 nungi asükwa mongpu

Parliament tenzüksü lia tanü party ajak senden nung BSP-i maneni sorkar dang linük tesem ajaklen caste census agitsü takhangba agütsüogo. Tangbo linük nung tesem ajaklen nungi iba takhangba agütsüdar, anungji iba atema Centre sorkari tangsa mera agia inyaksüla," ta metetdaksü.

"Jenang atuba, sensak tia, mapa manguba tebilemtsü, gari lenmang majungba, tzü, electricity, shisaliok, health aser tzüzüng-ozüng tensa ajanga

linük nung nüburtem timtemer, anungji caste census agitsüla aser iba indang awareness agütsüsüla," ta lai metetdaksü.

"State sorkar balalai temelung tesa dang agi dang nüburtem melung sütsüsü meranga loktiliba nung temeden tenüng nung ajemdaker caste census agir, ajisiüka Centre sorkari linük tesem ajaklen caste census agi nungang iba tebilemtsü koktettsü aser nüburtem nem temeden agütsütettsü," ta laisa metetdaksü.

1ST IMMAKMANGYANG MEMORIAL TABLE TENNIS TOURNAMENT ORGANISED BY TONGPANGSANGER CLUB CHUCHUYIMLANG



Tongti Tejaoker : Wt. Aienla Jamir. B.D.O. RD Block Tuli, Nagaland

9th December 2023. 8:00 AM - Imlang Salang

SENTONG TARENSEN

7:50 AM Flag Hoisting : Wt. Aienla Jamir, BDO.

- Compere : Wt. Imnasenla Asso. Pastor, Christian Education Ministry
- Sarasadentsu : Rev. T. Lima, Pastor, CBC
- Tarur pela agizukba : Wb. S Mar Jamir
- Ken Ka : Imlang Moputsur, i/c Officers
- Tongti Tejaoker O : Wt. Aienla Jamir BDO, RD Block Tuli
- Melepzung O : Wb. Washitemjen, Convenor, Organizing Committee
- Tatem sarasadem : Wb. Yangerenba, Deacon

Tanü state pezü nung assembly election agiba osang sangdongtsü

New Delhi, December 02 (Agencies): Tawa Madhya Pradesh, Rajasthan, Chhattisgarh aser Telangana state tem nung agiba assembly election votes Amongnü azüngtsü.

Sangküm Lok Sabha election agitsü atema ita trok dang lia agiba assembly elections ya semi-final tetoktepa ama asütsü.

Tang Rajasthan aser Chhattisgarh na nung Congress sorkar lir, Madhya Pradesh nung BJP sorkar lir aser Telangana nung BRS sorkar lir. Telangana nung K Chandrashekhar Rao-i aniba Bharat Rashtra Samithi (BRS)-i kümsük (term) asem buba sorkar akümtsü imlar.

Exit polls ajanga BJP-i Madhya Pradesh aser Rajasthan na nung takok angutsü aser Congress-i Telangana aser Chhattisgarh na nung takok angutsü, ta asadangtetogo.

Anepdang 8:00 ako nungi tenzüka vote azüngtsü; postal ballots tama azüngtsü iba sülen tanüngba votes azüngtsü.

Madhya Pradesh nung assembly menden 230, Chhattisgarh nung menden 90, Telangana nung 119 aser Rajasthan nung menden 199 atema candidates toktepogo.

Taküm May ita nung Congress-i Karnataka nung BJP sorkar atsüngdokba sülen maneni Madhya Pradesh aser Telangana na nunga tanga party sorkartem atsüngdoka sorkar akümtsü meranger aser parnoki yimsüsüba state ana-Rajasthan aser Chhattisgarh nunga maneni takok angutsü nükjidong yur nüboyima toktepogo.

BJP-i Madhya Pradesh nung kümsük pezübuba sorkar akümtsü nükjidong nung toktepa den külemi Rajasthan aser Chhattisgarh na nunga takok angutsü nükjidong nung toktepogo.

Madhya Pradesh nung menden 230 atema candidate 2,533-i toktep aser Rajasthan nung menden 199 atema candidate 1,800 dak temai toktepogo.

(Maneni tapak 8 nung...)



TIR YIMYIM YIMOBILEM (EDITORIAL)

DIMAPUR

AMUNGNÜ

LUCHII 03, 2023

Tajung ametang

Kechi nü dak tajung lir, aji jungjunga ametang mesüra temeneni ibaji menentsütsü. Asenoki repranga lia nisung tajung aika tamajung kuma aoba angur. Itemji pei dak aketba shisatsü aser sempet tajung jungjunga mametba ajanga lir. Temeneni teti asenok dak aketba jakla yimya aser sempet tajung menentsütsü atema mapang tajung repranga atar. Kodang Tsüngremi Adam aser Eve na nem agütsüba jangratemtsü taküm aser rongsen satani angu, satan jagi idangjisa item tajungtemji tena taküm nungi bener aotsü asoshi tasa yanglutsü tenzük. Kodang David chuba dak Tsüngrem akümstüsuba shisatsü tajung angu, satani idangjisa pa taküm jakla menentsütsü apuso. Aji oda, Adam o Eve na aser David taküm tapayutsüka satani menentsüba asenoki lai nung azünger. Iba amaji asenok shia dak sempet tajung keta lir aser asenok kibong shia nem temoatsü tapu balala agüja lir. Item sempet aser temoatsü manung asenok jangratema alibaji satani angur. Asenok ajaki Tsüngrem akümstüsuba peisasa pei azüoka alitsü meranger. Iba jagi asenok dang Tsüngremi kanga pelar saka satanbo item tajungtemji ngur kanga mepelar. Tanü asenok rongnung kibong aika jangratema aliba mapang raksabaji, asenoki asenok akaba tajungtem jungjunga mametba ajanga satani rakzüka bener aoba mapa ka asütsü. Nü dak sempet aser jakla yimya tajung alibaji tangari tenükmeremtsü. Nai nüsasa azüoka Tsüngrem akümstüsuba alibaji tangari menütsütsüa akok. Nai tangar yariba aser tenla tajung agütsüba nung tenüngsang mangutsüa akok. Item ama tajung anema asenok jashitsüsa aser tezü adangtsüsa aruba shisatsü ajakji satani asen dak aketba tajungtem bener aotsü merangba mapatem asütsü. Itemji asenok asoshi tatidang asütsü. Aji oda, asenoki asen akaba tajungtem dak jungjunga mametra, asenok dangi tejashitsü, tezüdangtsü aser azüapongtsü mapang arudang, asenoki item tajungtemji chiokadoktsü aser satani bener aotsü. Tsüngrem mapa atema tenla tajung agüja aliba tanemtanemi anenba, sarasadem nung tashimait akümba, Tsüngrem o bushitsü amadokba mapatem ajakji asenok taküm nung tajung alibatem menentsütsü atema satani inyakba mapatem asütsü. Ibayongji, 1 Tesalonika 5:21-22 nung ashir, "ajak tendanger tajungba ametang aser tamajung kechisarina nungi pilaa liang." Aji oda, asenok dak aketba tajung ajunga ya satani rakzükner asünungji, kechi tajung aji jungjunga amettsü aser tamajung ajak nungi pilaa alitsübaji asenok Khristan pur shia anogo shia teinyaktsü asütsü. Kibong nung apuani aser tanurtemji Tsüngremi agütsüba temoatsütem lir saka itemji menentsütsü atema Tsüngremi asenok dangi nüktapangtaba temeneni tatidang yoker. Asenok nem moatsüba rongsen agi asenok peria jangratema alir saka iba tepela taküm kibong menentsütsü atema satani asenok dangi rongsen nung morumoruba temeneni tatidang yoker. Itemji koktettsü atema asenok taküm ya teti sarasademba aser teti Tsüngrem o bushia aliba taküm asütsü nungdaker. Asenoki asenok dak aketba tajung aser temoatsütem ya teti asoshi lir ta mebilemstüla. Itemji asenoki tamshi meshira temeneni bener aotsü aser asenok tazüngla taküm akümstü. Aji oda, teti Tsüngremi agütsüba temoatsü aser sempettem amshia jangratema alitsü asoshi Laishibai lenmang tajung ka sayua lir, ibaji - "tamajung ajak nungi pilaa alitsüla." Tamajung nungi pila nung dang asenok dak tajung aliba jagi mapa tajung aika inyaktettsü aser Tsüngremi moatsüba tajung ajak agia jangratema alitsü.

OLEMSABANG

Christmas Sobutsü

Asongla pongen, Alempang ward, Mokokchung.

TETEZÜ KETA YANGLUBA BENJONG (Christmas) SOBUTSÜ.

January 2 nungi Küm tepiyong yongyaa ataba Christmas ronem to joko tonga aruogo. Talisa December ita anogo mezüng nungi benjong decoration tenzük. Ajaki jembitepa kaji taküma asen kidang, asen Tenla kidang, asen town, asen yimtsüng aser asen Ward nung komala decoration enoktsü ar na? Joko November second week nungi ki karbo benjong sobu yanglu tenzükogo aser joko December 1 nungi ajaki tenzüka aotsü.

Benjong Sobu enokba nung sen aika aoba dang masü saka meimchir melongjang nunga tetoktepa (competition) adokdaktsüba mapang ka akümer kodang Tetezü memeteti inyakdir. Iba tetoktepa mapa agi mapang aser nepo aika endoker kechiyong dangari inyakba dang nungi ozü, asenok, onok indang tajungba ta sayunudang aser bilemdang. Ibaji dang masü Yisu asoba benjong tenung atemer kar asoshibo decoration yangluba nungi sen leman bushiba mapa anidaker (hotel aser saisapong ajanga). Iba dangatetba nungi temelenshi kar adok nung koda ta bilema iba ocet ajanga lemsateper.

TETEZÜ KETA YANGLUBA BENJONG SOBU

Khrista yimsu tamangba agizüker tongmelang Tamang liyonga arudang, Yisu asoba benjong mapang Laishiba tesayuba dak ajemdaker Tetezü keta yangluba benjong Sobu enokba ajanga aika temoatsü ngua aruogo. Mongpo den beta aser koba atema penjongji amonger iba dangatetba nung benjong sobu yanglutsü tajungba. Asenok Yisu Khrista asoba anogo bilemteta amonger, anungji iba dangatetba nung Tetezü aketbatem amshia benjong Sobu enoktsüla. Ajaki meteta alitsü saka tatishitsü kar, Christmas Sungdong, Petinu, San aser Sannükertem, Tashi temeteterem, item enoka yangluba ajanga dang Khristantemi amongba Yisu asoba benjong Tetezü abensadaktsür.

RONGSEN LALUBA ASER TETOKTEPA DECORATION

Mapang shia danga yimsu yimpong (religions) amanger tem parnoki teka agi yangluba par tsüngrem tem kelema amongba mapang, aonung aser anungdang kecha mependangi tsüngsangtepa yimdong nung senzütepa ajanga parnok tekulemba ki, yimdong ajak aser talisa parnoki yangluba sungyanglu meketa tesangwa light tsükloker pelatepa mongtéper. Anungji asenoka iba chiluji ajizüka asen temeneni nungi kümzüksang kümtdakba Yisu Khrista asoba benjong nunga amshiteper.

Tetezü mangateti oda dangar tamanger benjong bentsü nung amshiba ajizüka inyakdang ali rongsen aika lalushipongba dang masü saka mapang aika endokba den tekolok ajak shisaa inyakteper. Joko benjong Sobu enokba nunga lokti balala aser Arogotemia tajungtiba inyakteter nem sempet agutsür, ibayongji iba mapa ya tetoktepa mapa ka kümdaktsür.

TESASATSÜ ASER TEMULUNG SHIRANG

Taoba Küm eshika, 2022 Tashi, Christmas decoration to khen meyipa shisadanga pei nuja kidangbo khen toktsür oda Temeshi tenla kidang aser temeket nung Christmas Sungdong, Petinu, San aser Sannükertem aser Tashi temeteterem etc, agi mapensa yangluba angur. Saka tesem ajaklen sentsüprang aser jenjang aika aketba tesangwa (lights) enoktepa ngua aruogo. Yamaji, Yisu Khrista asoba benjong dak aketba renom aser tetezü melel yanglutepa angudang temulung shiranger aser Khristantemi ya tashi dang Khrista asoba angatet no ta sasaa bilemer.

Anungji Taküm 2023 benjong Sobu enokba yabo tera temelenshiba ka nung, Laishiba tesayuba dak amentaker teronem menema aser Yisu asoba tensa mapang to khen lepa arua temelenshiba ka nung mongdi ni ta lemsateper. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nagaland Christian Revival Church (NCRC) mungdang tenzükogo



December 01, 2023 nü Agri Expo, Chümoukdeima nung Nagaland Christian Revival Church (NCRC) mungdang tetenzük sentong nung tangokba noksa nung angur.

Dimapur, Luchii/December 02 (TYO): Hokolbarnü Agri Expo, Chümoukdeima nung Nagaland Christian Revival Church (NCRC) mungdang tenzükogo, ta NCRC Media & Publicity Convenor, Hosheto Awomi-i sangdong ka nung metetdaksü.

Iba mungdang ya "Shibai tajung agi nü tejangrabatem tip-temdaksür. (T. Ken 103:5)" omen nung ajemdaker December 1 nungi December 3 tashi agitsü.

Iba mungdang nung tongti o jembirtemji NCRC Mission Secretary, Rev. Dr. Imchayanger aser London nungi Pastor, Sunday Oduola na lir.

NCRC General Secretary, Rev. Dr. Kiyezhe Chishi-i hall meshitetba sülen NCRC Phom chairman, B. Longai Phom leniba nung mungdang tenzükog liaisü.

Mezüng anogo nung tongti o jembirji NCRC Mission Secretary, Rev. Dr.

Imchayanger liaisü.

NCRC Tir, Rev. Vangpong Phom-i lokti pelaa agizükba o jemi, Diphupar CRC pastor, Kruzio-i NCRC puti otsü metetdaksü aser NCRC Sumi Choir den Angami Christian Revival Church Youth Association nati ken tena liaisü.

Iba mungdang ya Angami CRC Council chairman, Rev. Dr. Kecha Seyie leniba nung agir aser recording secretary ji NCRC Mission Director aser Pastor, Medühü Kezo lir.

Norfolk nung Christ Church-i küm 150 ajungba Jubilee mongogo

December 02, 2023: Taoba hopta tatemanglen Eaton, Norfolk nung aliba Christ Church-i Arogo küm 150 ajungba Jubilee mongogo.

Anogo pezünü sentong ya November 24 -27 anogotem nung agi. Iba Arogo ya 1973 küm November ita nung taoba mapang Norwich Bishop, John Pelham-i tenzükog liaisü.

Tenla kidang exhibition 60 dak tema liaisü aser Arogo züngsemtem den telok balalai agütsüba ano tapu 1,000 dak tema saya.

Iba Arogo nung züngsem, Vivien Humber-i, "Kechiba ango? Laishiba nung ango indang aiben shia lir- Yisu

nütsüng karbo angopurtem liaisü aser Pai (Yisu) amtsük pongu den ango anati nisung meyrjang pongu dak tema chiyungdaksüba indang shia lir. Akhidang nungi ango ya Khristan temaitsü ka liaisü," ta metetdaksü.

November 26, 2023 nü tenüngsang agütsüba sentong ka agi aser iba sentong nungji Bishop of Norwich, Lord Mayor Coucillor James Wright, Lady Mayoress Kate Atkins aser Sheriff Dr Sheldon nung aden.

"Bishop of Norwich, Rt Rev. Graham Usher leniba nung tenüngsang agütsüba sentongji agi aser ibaji 1873 küm

agiba sentong den mesüktepa liaisü.

Sentong nung osangtajung ken tasen ka- Simon Lole-i züluba 'Behold how good and joyful' ken aten; iba ken ya iba sentong atema alakteta mejemba liaisü, ta Vivien Humber-i metetdaksü.

"Kaket zülur nungtugu ana aser Arogo nunga züngsem-David Taylor aser Rachel Hore nati osangtajung ken tejen ka nung kenjang tasen kar inoka aten," ta paisa metetdaksü.

Iba Arogo küm 150 ajungba nungtem nung taküm benjung mongpu nung sentong aika ayongzükog agitsü, ta Arogoi metetdaksü.

Jesus Film 'animated version' nung sayatsü

December 02, 2023: Jesus Film Project-i JESUS film 'animated version' nung sayatsü; iba film ajanga Yisu Khrista taküm otsü tabensaba nung sayatsü, ta metetdaksüog.

JESUS film ya 2025 küm December ita nung alima tesem ajaklen theatres nung sayatsü.

JESUS film ya mezüng 1979 küm saya aser alima nung oshi teimtiba (2,000 dak tema) nung meyipba film ji iba film ya lir, ta Guinness World Record-i agizükog.

ajanga nisung aikati Yisu Khrista agizükog.

1979 küm sayaba JESUS film ama 'animated version' film ya-a osangtajung kaket Luk nung ajemaker yanglutsü aser Luk kaket nung Yisui jembiba otem teimbaka amshitsü saka film otsüji tera melenshitsü tebilemba lir.

Iba film tasenba ya-a tarutsü nung oshi 2,000 dak tema nung meyipzüksü tebilemba lir.

JESUS film director, Dominic Carola indang animated film tem- Mulan, The Lion King aser Lilo & Stitch kanga nungtugu aküm aser

JESUS film ya-a nungtugu akümtsü imlar.

Dominic Carola-i, "Onoki tang tasentiba animation technology amshitsü. Yisu indang chichiba otsü tajungtiba nung sayatsü aser alima nung aikati repringtettsü atema onoki inyakdar," ta metetdaksüog.

Jesus Film Project director tasenba Josh Newell-i, "Tamalen sayaba original film ama animated film yaa oshi 2000 dak tema nung adoka Yisu dak teimla ya alima tesem ajaklen prokshitsü imlar," ta metetdaksü.

ANOGO ABEN TSÜNGREM DEN

Anogoshia taküm pa adenba

Yohan 15:4-10

Atangji alima matem tashi, Ni nenok den teti tena lir. Mathi 28:20

Tanü aser alima matem tashi Yisu den jajatsübaji takoktsü asü? Asenoki Pa den dokan nung, office nung, kidang, yimdong nung Pa den jajatsü akok asü? Kodang timtem arudir aser asen mapa nung terakasa adokdir idangjia asenoki Yisu den jajatsü akok asü?

Telangzübaji temulung doka au. Yisu teti asenok den adentsü asenok kinüki aotsü mesüra tesülen atsüngzükog alitsü menüngdak. Pai Nazareth leman aser dokan metet aser asenok tekümtet kangki Yirusalem nung apur jaja. Pai asenok leman aser asenoki inyakba metet. Parnoki atitangba Pai metet. Pai parnok ola aser teratet metet. Pai parnoki bener aruba tebilemstsütem metet. Pa O aser Kibubai melaba mapa nung ammanng tammang ajanga Pai asenok anasai anir arur.

Taküm nung timtem ajanga aser anogo shia ajuruba nung tamakok alura asenok tamang idakji tatem makümer, kechiaser tatidangba aser tejashi tulu ajanga asen Kibubai tashi tulu agütsür. Saka ano office nung timtem, dokan nung mesüra kidang anogoshia tebilemstsütem bentettsü Pai tesüngjem tamang agütsür. Pa teti asenok den dena lir, tashi tait Kümtetdakba ka, temulung lemtsü tembar ka, mapa nung aser kidang temeim medemer ka.

Kibuba Yisu, Na teti anasa aser ozü nungdak ajak nung yaritsü renema aliba asoshi Ne tenüng asanger. Na teti onok den tena aliba metettsü onok dang yariang. Idangji Ne taochi ain ajanga onoki teti Ne den jajatsü. Amen.

Alima nung anti-conversion ozüng aliba linük 46 lir: ICC

Washington, December 02

(Agencies): Tawa United States Commission on International Religious Freedom (USCIRF) aser International Christian Concern (ICC) nati anti conversion ozüng dak sendakba report ka renema metetdaksüog.

ICC nungi researchers- Jay Church, McKenna Wendt aser Colton Grellier nung den USCIRF-i alima nung yimsü melenba tsütsü tenokdangba indang report renem.

ICC aser USCIRF report ajanga, tang alima nung anti-conversion ozüngtem benoka aliba linük 46 lir, aser ibaji alima nung aliba linüktem shilem 25 jungnüa lir, ta metetdaksü.

Alima tesem balala nung sorkartemi pei sensotem nem tamangba yimsü melentsü atema temeden magütsüi tenokdangba balala benoker.

ICC nungi research agirtemi anti-conversion ozüngtemji shilem pezü küma lemsa, aser itemji: pei yimsü toktsüba

nokdangba ozüng, yimsü balala amanger ana tsüngda kiyimba nokdangba, tangar kar tanga yimsü dangi meyipdaksüba nokdangba aser maitsü dak sendakba tenokdangba lir.

Item shilem pezü nungjagi tamajungtibaji pei yimsü toktsür tanga yimsü agizükba tenokdangba lir, ta ICC-i metetdaksü.

Pei yimsü toktsüba tenokdangba aliba linük tenet lir, aser item linüktem rongnung Brunei aser Yemen densema lir. Item linük nungbo Khristan yimsü agizükra tasüba temerenshi obendang-a agütsütsü.

Ano ozüng kaji pei yimsü tangar kar den lemsatepba tenokdangba lir aser iba ozüng kübok talisa Khristan missionary tem mapatem nokdangba ozüng ya linük 33 nung lir.

Ano yimsü balala amangertem tsüngda kiyimba nokdangba linük aika lir aser item linüktem rongnung Algeria aser Malaysia densema lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Sensamalem

(v) atala, tilutsü (insult)
* Sensamalem jakla adenba nisung azükaru masür.

Sensamasa

(v) atalaja menütsü (laugh at, insult)
* Ozü medemertemi ni kanga sensamasatsü.

OLONG PAITEP # 6632

			1			2		3		
4										5
6					7			8		
							9			
10							11			
12		13		14						
					15					
	16									

TIPIEN

- 2. Arem an - (4)
- 4. Temerang - (6)
- 6. Ajungbena - (7)
- 8. Ta ___ sa - (3)
- 10. Te_____ n - (4)
- 11. Lisü agi naibang - (4)
- 12. T ___ teri - (3)
- 14. Süngtsük agi yangluba bakus - (7)
- 15. Ayongküm - (6)
- 16. Yangi amendaker - (4)

LANGTSÜNGLEN

- 1. Sosem _____ - (7)
- 3. Sü yanglu - (4)
- 4. Sasapela - (9)
- 5. Teberem temalen - (9)
- 7. Mejanga onü - (4)
- 9. Hai haura aka - (7)
- 13. Tetsüng-i kara-a ao - (4)

OLONG PAITEP # 6631 TELANGZÜBA

TIPIEN

- 1. Arudaktsü, 4. Ma, 5. Sorak, 7. Nai, 9. Aten, 11. Lemdor, 14. Nungit, 15. Aong, 17. Nok, 18. Yimsü, 19. Sü, 20. Nokdakang.

LANGTSÜNGLEN:

- 1. Atsulang, 2. Sanen, 4. Mi, 6. Rama, 8. An., 9. Arang, 10. Awatsüng, 12. Ngum, 13. Pokpo, 15. Ao, 17. Nü.

NAI-A YA METETTER MA

Alima medical otsü nung tanur tetsü akümba tetsürtem r o n g n u n g tanutsütilaji Lina Medina liasü. La ya September 27, 1933 nü Ticrapo, Huancavelica Region, Peru nung aso aser la arishi küm pongu, ita tenet aser anogo 17 buba nung tanur tetsü ka aküm. La ya tang Peru yimtiba Lima nung lidagi.



Manipur police-i Ukhrul district nung poppy lu raksatsü



Imphal, December 2, 2023 (Agencies): Manipur police-i December 1 nü Tangkhul Hundung yimtsüng nung poppy alu acre 30 raksatsüogo. Iba ya Ukhrul district kübok Mapithel hill range nung lir.

Police-isa Imphal West, Thoubal aser Bishnupur district tem nung poppy alutem mita ao. Manipur police-isa NH-37 nung khu abenba gari 288 aser NH-2 nung khu abenba gari 293

tashi timtem kecha melii senzüdaktsü. Manipur nung hill aser valley district balala nung Nakas/ Checkpoints 141 lapoka lir aser ozüng alema inyaker nisung 335 tashi puogo.

BJP-i Mukul Sangma aser Vincent Pala na pelashishia agizüktsü

Shillong, December 1, 2023 (Agencies): Taoba Meghalaya chief minister Mukul Sangma aser Shillong MP Vincent Pala nati BJP nung adentsü lemtetra pelashishia agizüktsü ta BJP-i metetdaksüogo. Iba osang ya Meghalaya BJP lennir aser South Shillong constituency MLA Sanbor Shullai-i ashi. Taoba Meghalaya chief minister Mukul Sangma ya

TMC tongti lennir ka lir aser külen Shillong Lok Sabha constituency MP Vincent Pala ya Congress state unit president liasü. "Sangma aser Pala nati BJP nung adentsü mulungra onoki tena nem red carpet welcome agütsütsü kechiyong tenaprong ya state nung political lennir tejen lir" ta Meghalaya BJP MLA-i ashi. Ajisüaka Mukul Sangma-i

tesüiba nung pai BJP nung adentsü jembibaji tiyazü ta shiogo. Iba otsü ya tejen aser 2014 nungi jembia arur, ta pai ashi. "Ni otiotia dang ashi, hao tesüiba nung sendentem menogo. 2019-2020 nung ni senden aika nung aden kechiyong BJP-i 2023 general election atema lennir tejen kar den ajurutepnüa liasü" ta Mukul Sangma-i ashi.

Manipur nung refugee tem leper nung jenoka alir

Imphal, December 2, 2023 (Agencies): Manipur nung pei talidak toktsür jena aortem leper nung jenoktsüsa kümogo. Indian Youth Congress national president Srinivas BV-i Manipur nung aliba refugee camps sema senzü aser pai video ka nung nisungtem leper nung jenoka aliba indang sayu. Iba ya Kuki nunger teimba ser

aliba tesemtem nung lir. Nisungtem refugee camps nung masemer aser iba jagi anameta aliba lepertem nung jenoka alitsüsa akümer. "Manipur nung mepetmesü adoker ita 8 süir saka tang tashi telemtetba kecha mali aser nübortem timtemer" ta Srinivas BV-i ashi. "Sorkari iba tebilemtsü atema

mapa inyaktsüla aser lemtet ka agitsüla. Ita 8 tema süiogo aser nisung 40,000 tema relief camps nung lir. Parnok kobika alitsü? Ni tanur aika den jembioigo aser parnok kidangi onüba, school-i onüba aser medemertem den asayanüba shiogo. Ni parnok timtem tebang agi rasaa meshiteter" ta Srinivas-i video message nung shia lir.

Arunachal sorkari lisopur putir honorarium tutsütsü

Itanagar, December 2, 2023 (Agencies): Arunachal Pradesh chief minister Pema Khandu-i Honibarnü putir 3000 shi ka nem honorarium teimba agütsütsü osang metetdaksüogo. Putirtemi lisopur sobaliba wazüka ayuba atema taruba budget nung parnok honorarium

tutsütsü ta Khandu-i ashi. CM Pema Khandu-i Indigenous Faith Day benjung nung aden aser idangji Nyibus (Sharmans) külemba ola angashia pelaba metetdaksü. "Indigenous Faith and Cultural Society of Arunachal

Pradesh (IFCSAP)-i lisopur tamangba yimsütem reju ka ama küma maparen inyaka aruba atema tenüngsang agütsür" ta paisa ashi. Iba benjung ya pei sobaliba tera meteta alitsü aser taruba puti dang sayutsü atema ayongzüka amonger.



Honibarnü Kangla Fort, Imphal nung Manipur Chief Minister N Biren Singh aser kinungertem lia United National Liberation Front (UNLF) züngsem 550-i parade ka agidang tangokba noksa angur. UNLF-i November 29, 2023 nü India aser Manipur sorkartem den Peace Agreement nung sign sütepba sülen reception ceremony agidang iba parade agia liasü.



24TH Hornbill Festival 2023

DAY 3

MORNING - 10:00 AM

HOST
SHRI. SHARINGAIN LONGKUMER
SPEAKER
NAGALAND LEGISLATIVE ASSEMBLY

CO-HOST
SHRI. MHATHUNG YANTHAN
ADVISOR
AGRICULTURE

CO-HOST
SHRI. NAMRI NCHANG
MLA

CHIEF GUEST
LT. GEN PC NAIR
PVS, AVSM, YSM, PHD

TRIBAL GUEST
VILAZOSIE PUNYÜ
ANGAMI

AFTERNOON - 1:00 PM

HOST
SHRI. JACOB ZHIMOMI
MINISTER, PUBLIC HEALTH
ENGINEERING & COOPERATION

CO-HOST
SHRI. KROPOL VITSU
ADVISOR
PRISON, PRINTING & STATIONARY

CO-HOST
SHRI. NUKLUTOSHI
MLA

CHIEF GUEST
SHRI. PEMA KHANDU
HON'BLE CHIEF MINISTER
ARUNACHAL PRADESH

HONOURED GUEST
SHRI. PASSANG D SONA
HON'BLE SPEAKER
AP LEGISLATIVE ASSEMBLY

SCAN FOR HORNBILL SCHEDULE



OFFICE OF THE
AO SENDEN
"Nübur Asashi" (For the People)

02-12-2023

SANGDONGER

Mapang shia asen Ao litsü nung lokti tentetemi mokdang (Bandh/Agitation/Strike item amala..) balala ayongdang nüburtem tsüngda aiben memetetba timtem ajangshia arur.

Anungji tang nungi Ao litsü kübok lokti tentet shingai Ao Sendeni memeteti mokdang ayongtsü memelar. Iba tekümdangtsü sangdong kübok nübur ajaki tashi anga anidaksü metetdaksür.

Sd/-
(Chubawati Longchar)
President

Sd/-
(Imtipokyim)
Gen. Secretary

AKHOYA SENSO TELUNGJEM MOKOKCHUNG (ASTM)

MULUNG KOREM OSANG AYIMOKTSÜR

28th November, 2023 aonung Mokokchung Town Alempang kiyong nung ozü senso kibong ka nung kecha kuli makai memetetba nisung kari amokmeren o aika jembia kilung nung süngden aser Almiraah ajak lashia reprangba osang angashia iba ama tapi agi mapa tamajung inyakba Akhoya Senso Telungjem Mokokchungi kokoa aser retreta aitsür.

Ozüng kajetertemi kechi ama inyaksü tim, aji yakta inyadaksüner ta iba yimyim ajanga sangdonger.

Sd/-
Dr. Imliwati Longkumer
President, ASTM

Sd/-
Mr. Imtitemsu
Gen. Secretary, ASTM

Israel-i Gaza nung ano tesem noklang aika makogo

Gaza, Luchii/December 2 (Agencies): Hamas den anogo tenet rara anena atatsü asoshi tetanzüktepba yangluba tembangba sülen Honibarnü agi tananübuba Israel-i Gaza nung tesem aika makogo.

Gaza anüolentip nung aliba Khan Younis yimti kong Gaza anütoktip len nungi jenjang aoba nüburtem aika jenoka lir, iba tesem ya Hokolbarnü nungi amak tenzüik aser Honibarnü maneni asendenshir kanga mejungi makogo.

Gaza kübok tesem aika nung mokozü adokba nguogo aser Hamas-i achayangba Ministry of Health-i ashiba agi, Israel-i asendenshir Gaza amak tenzüikba sülen nisung 190 dak tema tepsetogo aser nisung noklang aika yiruo.

Israel-i ashiba agi, parnok indang ali, anüng aser tzüyim sempaitemi Gaza nung tesem 400 dak tema makogo. Military operation atsülanga inyaba mapang parnokisa nüburtem dang Khan Younis toktsür Egypt den arrtsü nung Rafah tesem leni aotsü asoshi metetdaksüo.

Hamas-i pua alirtem aser Israel-i tepuokdak yua aliba Palestine nungertem anogoshi melenteptsü asoshi nangzüktepba dak sendakba nung kati ka taginüba memulungtepba sülen rara anentsü asoshi tenanzüktepba yangluba chirepogo aser iba atema kati ka dak tai tongloksütepa arudar.

United Nations-i ashiba agi, Israel aser Hamas na maneni raratepba ajanga gaza nung nüburtem kanga timtema aliba

ya tamajungba akümtsü. "Gaza nung tensa kanga mejungi kümogo," Geneva nung UN humanitarian office indang otongdar Jens Laerke-i ashi. "Tanü ghonda ishika tsüngda nisung aika tepsetba aser yiruba osang angazükogo. Nüburtem dang ano tanaben parnok aliba tesem toktsür aotsü metetdaksüo. Timla samatsüo," ta UN aid chief Martin Griffiths-i ashiba den Gaza nung aliba tebur, tetsür aser tanurtem kümzüka alitsüba tesem kecha mali aser parnok taküm liyonga aotsü asoshi chiyongtsü aser tanga tenüngdangbatem agi kanga anünger.

November 24 nü nungi tenzüka rara anena atatsü asoshi anaben tashi atsülangogo aser Israel-i ashiba agi, Hamas-i anogoshia parnoki pua alirtem nisung ter chiokra rara anena atatsü. Ajisüaka anogo tenet sülen nisung timba chioktsü asoshi inyaksangshi mesüteti liasü. Anogo tenet tsüngda tetsür, tanur aser bendangertem chioka liasü.

Hamas-i pua aliba tetsürtem ajak chioktsü asoshi memulungba atema Israel-i parnok aitsüo. Palestine nung ketdangsür kati ashiba agi, Israel nung tetsür sepaitem dak sendakba nung haihaura makatetba ajanga iba tenanzüktepba raksa liasü.

Al Jazeera osangbener Hind Khoudary-i Deir el-Balah, Gaza nungi ashiba agi, Israel nung indang tank temi maneni tesem balala makdar aser ano tzüyim nungia rong ajanga Gaza tanen maka makdar.

October 7 nü Hamas-i Israel amakba sülen Hamas pur samatsütsü asoshi Israel-i nangzükogo. Iba anogo Israel nung 1,200 tepset aser nisung 240 pur oa liasü.

Iba sülen Israel-i Gaza maka iba tesem kanga mejungi raksatsüo, koba 2007 küm nungi Hamas-i yimsüsü arudar. Palestine nung health ketdangsürtemi ashiba agi, Gaza nung alir nisung 15,000 dak tema tepsetogo, kong tanur 6,150 densema lir aser iba den nisung meyirejang aika samar bushidar.

Qatar, shirnoki tiyongtsü ia inyaksangshidar, parnoki ashiba agi, rara anentsü asoshi Israel aser Palestine den maneni sensaksemdar, ajisüaka Israel-i asendenshir Gaza amakba ajanga ken o tebenja kümduksüo.

Kasa mapang nung Israel-i ashiba agi, parnok nükjidong tongtibangtibaji takokba tashi pua alirtem chiokdaksütsü asoshi lir aser iba atema parnoki Hamas nongshia arudar.

Ketdangsürtemi ashiba agi, rara anena ataba mapang Hamas-i nisung 110 chiokogo aser Israel-i Palestine nung tepuoker 240 chiokogo. Kasa mapang nung Israel-i East Jerusalem aser West Bank nung parnoki chiokba den meneptepa Palestine nungertem puogo.

US ketdangsürtemi Wall Street Journal osang kaket dang ashiba agi, Gaza nungi Hamas pur raktoktsü atema teyari agütsütsü asoshi Washington-i Israel nem hadir aser artillery shell meyirejang aika den "bunker buster" bomb tem agütsüo.

Pakistan kübok Punjab province nung TTP, ISI kiralongrar 14 apu

Islamabad, Luchii/December 2 (Agencies): Counter Terrorism Department (CTD) Punjab-i sangdong ka ajanga ashiba agi, itangiter osang dak ajemdaker parnoki province kübok district balala nung tesem 147 meita ao aser iba mapang kiralongrara 14 den prangbong injang, bomb aser tenokdangba agütsür aliba osettem pua liasü.

"Punjab kübok tesem balala meita aoba mapang tenokdangba agütsür aliba teloktem den sendaka aliba kiralongrar 14 tashi pur kiralongrar sentongtem raksatsüo," ta CTD indang otongdar kati metetdaksü.

Itangiter osang dak ajemdaker Gujranwala, Bahawalpur, Sahiwal, Faisalabad, Sargodha aser Lahore yimitem meita oa liasü, ta paisa shisem.

Kiralongrartem ya timba Daesh (ISIS) aser Tehreek-e-Taliban Pakistan (TTP) züngsemtem liasü aser tanungba ya Lashkar-e-Jhangvi (LeJ) kiralongrar telok den sendaktepa liasü.

CTD otongdar-isa ashiba agi, kiralongrartem province kübok tongtibang tesemtem amaksü asoshi tasa asa liasü.

Kiralongrartem ket nungi tapoktsü seret 4.3 shi, hand grenade asem, IED bomb pezü, detonator 20, safety fuse wire süklep 32, prima card süklep 6.5, tenokdangba agütsür aliba kakettertem aser sen ngutetogo, ta pai ashi.

Police-i kiralongrartem anema ken o 13 benokogo aser parnok dang ken o ashishitsü atema mejangjaba tesem kati anirogo, ta kasa sangdong ajanga metetdaksü.

South Korea-i mezüngbuba spy satellite yokogo

Seoul, Yimpoksüi/November 2 (Agencies): Elon Musk meyong SpaceX indang rocket ka amshia South Korea-i parnok indang mezüngbuba spy satellite yokogo.

Hopta ana tejekdang parnok tsükchir North Korea-i parnok indang reconnaissance satellite ka yokogo, ta sangdongba sülen Honibarnü South-ia parnok indang satellite yokogo aser iba ajanga kidanger linük ana tsüngda anüng nung tetoktepba tali akümba sayur.

South Korea indang satellite koba "KOREA"-emblazoned SpaceX rocket kati bener atu iba ya in California nung Vandenberg Space Force Base nungi khaketa yok aser minute ishika lir orbit-i ai aser anepdang 11:37 ako nung ground control den sendaktepteta liasü, ta South Korea Defence ministry-i ashi.

Iba satellite ajanga North Korea tali tajungba meita atatsü asoshi Seoul nem tashi agütsütsü, shirnok surveillance atema United States dak dang metaloker arudar.

Satellite ya alima nungi km 400 nungi 600 tsüngda nung inyaksangshitsü aser iba ajanga centimeter 30 tulu osettem den putettsü, ta Yonhap news agency sangdong ka ajanga metetdaksü.

South Korea shirnok North den rara nung arudar parnoki ano Pyongyang tajungba meita atatsü asoshi 2025 küm tatem tashi nungbo spy satellite pezü yoktsü sentong lir.

North Korea-i taoba ita Malligyong-1 satellite yokba sülen US, South Korea aser Japan-i parnok aitsüo. Parnoki ashiba agi, Pyongyang idang space programme ya tenokdangba agütsür aliba ballistic missile technology tendangtsü atema amshiba dang lir.

Linük balalai tenokdangba agütsür liaka Kim Jong Un lenisüba nung North Korea indang nuclear hadirtem aser ballistic missile capabilities kanga kara renlokaogo.

Honibarnü North Korean state media-i ashiba agi, US-i parnok indang satellite programme minprongra aji raratsü jazükba ama agitsü.

Nagaland nungi shooter pezü national shooter ama qualify süogo

Dimapur, Luchii/December 2 (TYO): Tawa tembangba 66buba National Shooting Championship competition nung minimum qualifying score ngutetba sülen Nagaland nungi shooter pezü national shooter ama qualify süogo.

National Rifle Association tir Merang Jamir-i sangdong ka ajanga ashiba agi, Neizo Belho-

i 10 Metre Air Pistol Men Individual nung point 571 ngua 2024 küm Selection Trial atema qualify süogo.

Imnanungsang Tzudir-i 10 Metre Air Pistol Sub-Youth Men Individual nung point 535 ngua Renowned Shot ama qualify süogo aser Kimatsung Jamir-ia 50 Metre Peep Sight Rifle Prone Men Individual

nung point 599 ngua Renowned Shot ama qualify süogo.

Kasa mapang nung Yimyakumla-ia 10 Metre Air Rifle Sub-Youth Women Individual nung point 595.5 ngua Renowned Shot ama qualify süogo aser Lanu Rongsenkaba Jamir-i 10 Metre Air Pistol Master Men Individual nung point 536 ngua liasü.

India-i Pakistan ajateta T20I timba akokba team kümogo

Luchii/December 2, 2023 (Agencies): India team-i Hokolbarnü otsü tasen ka yanglua T20I puti otsü nung iba asaya timbaben aokba team kümogo. Australia den Raipur nung asayaba mapang India-i iba alizüing tongteta liasü. Iba asaya ya India-i run 20 agi akok aser iba asayamung 3-1 agi akokba dang masü saka T20I 136buba akokba liasü.

2006 küm nungi tang tashi nung India-i T20I asaya 213 asayaogo aser asaya 136 akoba den asaya 67 nung tamakok angu aser asaya ka kasasa nung tembanga liasü. Asaya asem result kecha matoki tembangba sülen India team indang win percentage 63.84 lir. Asaya 136buba akokba sülen India team-i Pakistan ajatetogo, shirnoki T20I asaya 226 nungi

135 koker lir.

Asia linük ana sülen tasembuba jenjang nung New Zealand (Asaya 200 nung takok 102), pezübuba nung Australia (asaya 181 nungi takok 95), aser pongububa nung South Africa (95 Asaya 171 nungi takok 95) lir.

Hokolbarnü Australia den kanga dang tongtibang asaya ka nung India-i run 175 target tokja liasü. India nunger asayartem rongnungi Yashasvi Jaiswal, Rituraj Gaikwad, Rinku Singh, aser Jitesh Sharma nungeri kanga junga asayaba sülen parnoki over 20 nung asayar 9 out ser run 174 yanglua liasü. Australia nunger bowler tem rongnungi Ben Dwarshuis-i run 40 agütsür wicket 3 agi aser Tanveer Sangha (2/30) o Jason Behrendorff (2/32) natia pa

nem teyari agüja liasü.

Australia team-i run kanga junga arishia tenzük aser Travis Brisk-i run 31 yanglu, saka pa out asüba sülen team-i junga masayateti aküm. Matthew Short (22) aser captain Matthew Wade (36 not out) nati kanga meranga asaydang ajisiüaka run 20 agi memenepe asaya tembangba liasü. Parnoki over 20 nung asayar 7 out ser run 154 dang yangluteta liasü. India team bowler tem rongnungi Axar Patel-i ball kanga junga ona pai run 16 agütsür wicket 3 agi aser pa nem Ravi Bishnoi (1/17) aser Deepak Chahar (2) nati teyari agüja liasü.

Asaya ka anunga lia India-i iba asayamung kokogo aser iba asaya atema Axar Patel nem 'Player of the Match' naroküm agüja liasü.

Patil & Saika na India tetsür team nung züngoksemogo

Luchii/December 2, 2023 (Agencies): England den T20I asayamung atema Board of Control for Cricket in India-i asayartem tenüing sangdongba nung tang mezüngbuba Shreyanka Patil aser Saika Ishaque na India tetsür senior team nung züngoksemogo. Iba asayamung ya Harmanpreet Kaur lenisüba nung Wankhede stadium nung asayatsü.

Selection committee-isa, England aser Australia den Test asaya ana asayatsü aliba atema asayartem tenüing sangdongogo. India tetsür team küm teku sülen tang mezüngbuba Kidang Test asayatsüba lir aser iba team ya-a Harmanpreet lenisüba nung asayatsü. India team 2021 küm England aser Australia den Test ana asayaogo.

England den asayatsü aliba T20 team nung Shreyanka den ano Mannat Kashyap aser Saika nata tang mezüngbuba team nung züngoksemogo. Pacer Renuka Singh Thakur-a mapang tatsüka anisüngzükba sülen team nung züngoksemogo aser pa format anaprongla nung asayatsü. Test team nung Karnataka nungi Shubha Satheesh aser lanur pacer Titas Sadhu nata densema lir.

Shreyanka-i joko mapang tatsüka kanga junga asaya

arudar aser la senior team nung anioktsü imla liasü. Spin-bowling allrounder ya Royal Challengers Bangalore nungi asaya liasü. Iba sülen la ya Caribbean Premier League nung asayaba mezüngbuba India tsür aküm, kong la Guyana Amazon Warriors-i asayamung akokba nung wicket timtiba agiba asayar liasü. Maneni lai India A team nungia kanga junga asayaogo.

Kanika-a RCB nungi season ka kanga junga asayaogo aser la India A nung densema lir. La team nung adenba ajanga middle order tashi taitba kümdaktsütsü.

Left-arm spinner Saika-a WPL nung Mumbai Indians nungi kanga junga asayaogo. La test team nunga züngoksema lir. Mannat ya-a left-arm spinner ka lir aser la takümküm tetenzüklen South Africa nung asayaba mezüngbuba ICC Women's Under-19 T20 World Cup akokba India team nung densema liasü.

Test nung ano Jemimah Rodrigues, veteran spinner Rajeshwari Gayakwad, Sneha Rana aser Harleen Deol nungera densema lir.

England den T20I asem asayatsü aliba ajak ya Wankhede Stadium, Mumbai nung asayatsü, mezüngbuba

asaya ya December 6 nü asayatsü aser iba sülen December 9 aser 10 nü tanabuba aser tasembuba asayatsü.

Kasa mapang nung England den Test asaya ya DY Patil Stadium nung December 14 nü nungi tenzüka asayatsü aser iba sülen Australia den Wankhede Stadium nung December 21 nü nungi tenzüka asayatsü. Test anaprongla ya anogo pezüzü asayatsü.

England den T20I asaya asem atema asayartem: Harmanpreet Kaur (C), Smriti Mandhana (VC), Jemimah Rodrigues, Shafali Verma, Deepti Sharma, Yastika Bhatia (wk), Richa Ghosh (wk), Amanjot Kaur, Shreyanka Patil, Mannat Kashyap, Saika Ishaque, Renuka Singh Thakur, Titas Sadhu, Pooja Vastrakar, Kanika Ahuja, Minnu Mani.

England & Australia den test asaya atema asayartem: Harmanpreet Kaur (C), Smriti Mandhana (VC), Jemimah Rodrigues, Shafali Verma, Deepti Sharma, Yastika Bhatia (wk), Richa Ghosh (wk), Sneha Rana, Shubha Satheesh, Harleen Deol, Saika Ishaque, Renuka Singh Thakur, Titas Sadhu, Meghna Singh, Rajeshwari Gayakwad, Pooja Vastrakar.

Rafael Nadal January ita Brisbane International nung asayatsü



Luchii/December 2, 2023 (Agencies): Rafael Nadal yiruba ajanga mapang talangka masayateti arur January ita Australia nung Brisbane International nung asayatsü, ta Grand Slam 22 tashi koker aliba asayar yagi Hokolbarnü metetdaksü.

"Küm ka tepeyong masayai aruba sülen meyipa arua asayatsü mapang tongogo," ta Nadal-i, social media nung lemsatepba video ka ajanga ashi. "January ita mezüngbuba hopta Brisbane nung asayatsü. Idakji ajurutepti," ta pai ashi.

Arishi küm 37 tain Spain nunger asayar ya taoba January ita nungi asayamung ka nung danga masayai arudar. Australia Open asayaba mapang pa hip flexor yiruba sülen

masayatetsüsa aküm.

May ita French Open asayatsü hopta ka shi danga anunga lir Nadal-i pa iba asayamung nung masayatetsü ta metetdaksü, koba pai otsü tasen ka yanglua 14 ben koka lir. Paisa pa kodang nungi asaya tenzüktsü aji mejangja ta shia liasü.

Paisa, 2024 kümbo asayatetsü imla atar ta shiogo, koba pai ashiba agi pa asoshi tatembangbuba season asütsü akok.

"Kechi ataloktsüra kecha meteta mali. Ajisiüaka ni taruba küm tatembangbuba asayatsü tebilemba lir," ta pai iba mapang osangbenertem den sensaksemdang ashi.

Iba sülen pa June ita Barcelona nung arthroscopic surgery agia liasü.

2022 küm tatem tashi nung arishi küm 37 tain Spain nunger asayar ya asaya teku asayaba nung tenet nungbo tamakok ngua liasü.

Nadal-i tang tashi nung Grand Slam 22 koker aliba ya Djokovic (24) sülen tanabuba lir.

WWII Vintage Motor Car Rally... (Tapak 2 nungi...)

Kasa mapang nung NAMS mandenbuba aser Adviser to CM & Chairman, IDAN Abu Metha-i okila nung iba sentong meraketsüba atema Chief Minister, Neiphiu Rio dang kanga pelaba lemsatep aser ashiba agi, WWII Vintage Motor Car Rally ayongzüka agitsü ya pai apitetba lir. Paisa, tongti tesemdanger ama sentong nung shilem agiba atema German Consulate General Counsel, Barbara Voss dang kanga pelaba lemsatep.

Maneni Rally Commander, Moa Longkumer-i ashiba agi, rally ya Adviser, Industries & Commerce, Hekani Jakhalu Kense-i NAMS Hq. Dimapur nungi tenzükja liasü.

Ajak senteper iba rally nung gari 21-i shilem agi, kong Dimapur nungi gari 12 aser

Kohima nungi gari 9 densema liasü. Slovakia aser Germany nungia nüburtemi iba sentong nung shilem agia liasü.

Rally nung naroküm balala angurtem:

Best Discipline Squad: Jeep No. 25

Best Tourism Promotion Squad: Jeep No.13

Best Ladies Squad: Jeep No.11

Best Armoury Squad: Jeep No. 02

Best Uniform Squad: Jeep No. 20

Best Maintained Vehicle : Jeep No. 04

Most Original Vehicle: Jeep No. 03

Rally shibangba sentong ya Dr.Tolto Metha lenisüba nung agi aser General Secretary, NAMS, A. Tovi Chophi-i tepela o jembia liasü.

Tanü state pezü nung... (Tapak 3 nungi...)

Chhattisgarh nung menden 90 atema candidate 1,181-i toktep aser Telangana nung menden 119 atema candidate 2,290-i toktepogo.

Tawa Mizoram nunga assembly election agiogo, ajisiüaka vote bo December 4 nü ang azüngtsü. Amongnü ya Khristantem atema temeshi anogo lir, anungji Khristan nütüing teimba aliba state nung

December 3 nü vote azüngtsü aliba anogoji melenshiang, ta lokti tentet aikati Election Commission dang akhangba sülen vote azüngtsü atema anogo ka atsülangtsüogo, anungji December 4 nüa ang vote azüngtsü.

Mizoram nung assembly election November nü agi aser state nung voters shilem 80.66-i vote agüja liasü.

BILEMDANGANG

"Mapa inyaktsü mulungtetertem asoshibo lenmang sadema lapoka lir."